

REVIZORSKA KOMORA FEDERACIJE BOSNE I HERCEGOVINE

Broj: 02-231227-3

Datum: 27.12.2023. godine

Na osnovu člana 18. tačka g) Statuta, a u vezi sa članovima 3., 36. i 37. Statuta, te u vezi sa članovima 58., 62. i 89. stav (2) Zakona o računovodstvu i reviziji u Federaciji Bosne i Hercegovine ("Službene novine Federacije Bosne i Hercegovine", broj 15/21 - dalje u tekstu: "Zakon"), Upravno vijeće Revizorske komore Federacije Bosne i Hercegovine (dalje u tekstu: Komora) donosi:

PRAVILNIK O ČLANSTVU U REVIZORSKOJ KOMORI FEDERACIJE BOSNE I HERCEGOVINE

OPĆE ODREDBE

Član 1.

Ovim Pravilnikom bliže se regulišu prijem članova, svojstvo, prava, obaveze i odgovornosti članova i prestanak članstva u Komori.

Članstvo u Komori utvrđeno je Zakonom i Statutom Komore.

Osnovna načela ponašanja i postupanja članova tijela Komore, komisija, zaposlenih osoba i na drugi način angažiranih osoba u Komori uređena su Pravilima ponašanja i postupanja u radu Revizorske komore Federacije Bosne i Hercegovine, koji donosi Skupština Komore.

Utvrđivanje iznosa i način plaćanja članarine i naknada Komori uređeni su Odlukom o stopi doprinosa, iznosu članarina i naknada Revizorskoj komori FBiH, koju donosi Skupština Komore.

Član 2.

Članovi Komore su društva za reviziju i ovlaštene revizori koji posjeduju licencu Federalnog ministarstva finansija (u daljem tekstu: Ministarstvo).

Članstvo u Komori obavezno je za društva za reviziju i licencirane ovlaštene revizore.

Član 3.

Članovi Komore dužni su čuvati i unaprijeđivati ugled revizorske struke i Komore, savjesno i profesionalno postupati u izvršenju svojih ovlaštenja propisanih Zakonom, te izvršavati svoje obaveze prema Komori i njenim tijelima.

Član 4.

Članovi Komore imaju jednaka prava, bez obzira na rasnu, polnu, nacionalnu i vjersku pripadnost, političko i drugo opredjeljenje, u skladu sa Zakonom i Statutom.

Članovi Komore imaju status punopravnih članova.

PRIJEM ČLANOVA

Član 5.

Za prijem u članstvo Komore, ovlaštene revizor odnosno ovlaštena osoba društva za reviziju podnosi zahtjev za upis u Komoru, uz uplatu naknade za upisninu koja je utvrđena Odlukom o stopi doprinosa, iznosu članarina i naknada Revizorskoj komori FBiH i uz ispunjavanje uvjeta definiranih Zakonom i Pravilnikom o načinu i uslovima izdavanja i oduzimanja licenci ovlaštenim revizorima i društvima za reviziju („Službene Novine FBiH“ br.28/21).

Svojstvo člana Komore stječe se posjedovanjem licence Ministarstva i upisom u registar članstva.

Zahtjev za upis u članstvo Komore, ovlaštene revizor odnosno ovlaštena osoba društva za reviziju, podnosi u roku od 8 (osam) radnih dana, od sticanja zvanja revizora, odnosno registracije društva za reviziju.

Član 6.

Osoba koja je ispunila naprijed navedene uvjete upisuje se u registar članstva Komore.

Registri članstva i njihovo vođenje utvrđeni su Statutom Komore.

Osim registara članstva, Komora vodi i evidenciju vezano za izvršavanje novčanih obaveza članova prema Komori i evidenciju o kontinuiranom stručnom usavršavanju licenciranih revizora u organizaciji Komore. Ove evidencije vodi stručna služba Komore.

PRAVA, OBAVEZE I ODGOVORNOSTI ČLANOVA

Član 7.

Članovi Komore imaju sljedeća prava i obaveze:

1. da u svom radu postupaju u skladu sa Zakonom, pravilima struke, Kodeksom profesionalne etike, Statutom i drugim opštim i pojedinačnim aktima Komore,
2. da učestvuju u radu Komore i njenih tijela, da podnose prijedloge, da biraju i budu birani u organe i druga tijela Komore,
3. da iniciraju donošenje odluka iz nadležnosti Komore, kao i da predlažu mjere i radnje za unapređivanje položaja i ugleda revizorske struke,
4. da profesionalno i savjesno izvršavaju odluke Komore,
5. da uredno izvršavaju novčane obaveze prema Komori,
6. da obezbjeđuju svoje kontinuirano stručno usavršavanje kao licencirani revizori,
7. da čuvaju poslovnu tajnu,
8. da uredno postupaju po preporukama i smjernicama Upravnog vijeća i drugih tijela Komore,
9. da čuvaju i unaprijeđuju ugled Komore.

Član 8.

Članovi Komore plaćaju Komori članarinu.

Visina članarine i drugih naknada Komori, način i rokovi plaćanja utvrđuju se Odlukom o stopi doprinosa, iznosu članarina i naknada Revizorskoj komori FBiH

Član 9.

Članovi Komore povredom dužnosti i ugleda članova Komore čine povredu za koju se odgovara disciplinski.

Povrede dužnosti i ugleda, kao i postupak za utvrđivanje povreda dužnosti i ugleda društava za reviziju i licenciranih ovlaštenih revizora, tijela za pokretanje i vođenje postupka utvrđeni su odredbama Statuta i Pravilnika o disciplinskom postupku.

PRESTANAK ČLANSTVA

Član 10.

Članstvo u Komori prestaje:

1. prestankom subjektiviteta fizičke odnosno pravne osobe člana,
2. usljed prestanka ispunjavanja uslova utvrđenih Zakonom i Pravilnikom o načinu i uslovima izdavanja i oduzimanja licenci ovlaštenim revizorima i društvima za reviziju, odnosno usljed gubitka licence koju izdaje Ministarstvo,
3. isključenjem, usljed kršenja odredbi Zakona, pravila struke, Kodeksa profesionalne etike, Statuta i drugih opštih i pojedinačnih akata Komore,
4. isključenjem, usljed neizvršavanja obaveza prema Komori i neplaćanja članarine,
5. na preporuku Disciplinskog vijeća, nakon pravosnažno utvrđene disciplinske odgovornosti za povrede Zakona i za teže povrede Međunarodnih standarda revizije, drugih pravila revizorske struke i akata Komore.

Član 11.

Odluku o prestanku članstva odnosno odluku o isključenju iz članstva donosi Upravno vijeće.

Protiv Odluke o prestanku članstva i brisanju iz evidencije ili odluke o isključenju može se podnijeti prigovor Skupštini Komore u roku od 15 dana od dana prijema Odluke.

Po dostavljenom prigovoru Skupština je dužna odlučiti u roku od 6 mjeseci.
Konačna odluka se dostavlja Ministarstvu.

ZAVRŠNE ODREDBE

Član 12.

U cilju što efikasnijeg provođenja Statuta i ovog Pravilnika, ali i rješavanja svih eventualnih spornih pitanja vezanih uz članstvo, Upravno vijeće može donositi posebne pojedinačne odluke, utvrđivati procedure i sl.

Član 13.

U postupku primjene ovog Pravilnika analogno se primjenjuju odgovarajuće odredbe Zakona, Statuta Komore i drugih općih i pojedinačnih akata Komore.

Član 14.

Izmjene i dopune ovog Pravilnika, kao i tumačenje, u nadležnosti su Upravnog vijeća.

Član 15.

Ovaj Pravilnik stupa na snagu danom donošenja.

Upravno vijeće
Revizorske komore
Federacije Bosne i Hercegovine